

**Isertitsivinniittunut pensioniniittunullu aamma
eqqartuunneqartunut misiligummillu iperagaallutik
inuiaqatigiinnik kiffartuussisunut ajutoornerup il.il.
kingunerisaannut taarsiissuteqartarneq
ajunngitsorsiassaqaqtitsisarnerlu pillugit nalunaarut**

Kalaallit Nunaanni pinerluttulerineq pillugu inatsimmi nr. 306-imi, 30. april 2008-meersumi § 242 tunngavigalugu makku aalajangersarneqarput:

§ 1. Uku ajoqusersimatillugit naalagaaffik taarsiissuteqartarlunilu ajunngitsorsiassaqaqtitsisarpoq:

- 1) isertitsivinniittut pensioniniittullu, aamma
- 2) eqqartuunneqartut misiligummillu iperagaallutik inuiaqatigiinnik kiffartuussisut.

§ 2. Taarsiissutit ajunngitsorsiassallu pillugit suliat Kalaallit Nunaanni sulisilluni ajoqusersinnaanermut sillimmasiisarneq pillugu inatsisip allannguutaa pillugu peqqussummi nr. 991-imi, 3. oktober 2008-meersumi malittarisassat tunngavigalugit suliarineqartassapput, allannguutit nalunaarutip matuma nassatarisai malillugit.

§ 3. Ajoqusernermik oqarnermi makku pineqarput:

- 1) ajutoorneq/ajunaarneq, aamma
- 2) inuussutissarsiutip nassatarisaanik nappaatit.

§ 4. Taarsiissuteqartoqartassaaq ajunngitsorsiassaqaqtitsisoqartassallunilu ajoquserneq ukunani pisimappat:

- 1) isertitsivimmiinnerup nalaani,
- 2) isertitsiviup avataani sulinerup nalaani, ajoqusertoq sulisitsisumi isertitsivimmut attuumassuseqanngitsumi sulisimanngippat,
- 3) isertitsiviup avataani ilinniarnermik ingerlatsinerup nalaani,
- 4) isertitsiviup avataani akuerisaasumik ingerlataqarnerup nalaani, aamma
- 5) nr. 2-4-mi taaneqartutut suliaqarnermut atatillugu ingerlaarnermi.

Imm. 2. Aammattaaq ajoquserneq inuiaqatigiinnik kiffartuussinerup nalaani pippat taarsiissuteqartoqartassaaq ajunngitsorsiassaqaqtitsisoqartassallunilu.

§ 5. Ajoqusergup ukiumoortumik isertitai Kalaallit Nunaanni sulisilluni ajoqusersinnaanermut sillimmasiisarneq pillugu inatsisip atortuulersinneqarnera pillugu peqqussummi nr. 991-imi, 3. oktober 2008-meersumi § 29, imm. 1 tunngavigalugu Kalaallit Nunaanni Ajoqusersinnaanermut Sillimmasiisarfiup naliliinera tunngavigalugu aalajangersarneqassapput, ajoqusergup isertitsivimmut inissinneqarnini sioqqullugu inissinneqarsimanermilu nalaani inuussutissarsiornikkut isertitai isiginarlugit.

§ 6. Ajoquserneq Sulisilluni Ajoqusersinnaanermut Sillimmasiisarfimmut nalunaarutigineqassaaq:

- 1) ajoqusergup tamanna qinnutigippagu

- 2) ajoqusernerup Kalaallit Nunaanni sulisilluni ajoqusersinnaanermut sillimmasiisarneq pillugu inatsisip atortuulersinneqarnera pillugu peqqussut nr. 991, 3. oktober 2008-meersoq tunngavigalugu pisartagaqalerneq tunngavissalersinnaagaa ilimagineqarpat, tak. peqqussummi § 36.

§ 7. Nalunaarutip matuma atorneqarnera pillugu apeqqutit, matumani ajoqusernarmik nalunaarutiginninneq ilanngullugu eqqarsaatigalugu, isertitsivimmit ajoqusernerup piffigisaanit suliarineqartassapput. Ajoqusertoq Pinerluuteqarsimasunik Isumaginnittoqarfiup avataani inissiivimmut il.il. nuunneqarsimappat inissinneqarsimappalluunniit apeqqutit taamaattut inissiivimmit ajoqusergup nuutsinneqarfisimasaanit isertitsivimmilluunniit ajoqusergup i-nissinneqaqqaarfisitaanit suliarineqartassapput.

Imm. 2. Ajoquserneq inuiaqatigiinnik kiffartussinerup nalaani pisimappat apeqqutit imm. 1-imi taaneqartut immikkoortortaqaarfimmit ajoqusergup nakkutiginnittuusumit suliarineqartassapput.

Imm. 3. Ajoquserneq nalunaarutigineqanngippat, tak. § 6, nr. 2, ajoquserneq pillugu allakkiortoqassaaq (notat), paasissutissat ajoqusernarmik Sulisilluni Ajoqusersinnaanermut Sillimmasiisarfimmut paasissutissiisutigineqartut assinnginik imaqartumik, nalunaaruteqarnermilu immersugassaq isertitsivimmi/suliffeqaarfimmi tigummineqartoq atorneqarsinnaavoq.

Atortuulersitsineq il.il.

§ 8. Nalunaarut manna 1. januar 2010-mi atuutilersinneqarpoq.

Imm. 2. Kalaallit Nunaanni Pinerluuteqarsimasimasunik Isumaginnittoqarfiup isertitsiviiniitineqartut ajoqusernerisa kingunerisaannut taarsiissuteqartarneq pillugu nalunaarut nr. 1093, 19. december 2001-imeersoq atorunnaarsinneqarpoq.

§ 9. Nalunaarut manna ukunani atorneqassaaq:

- 1) ajoqusernarni 1. januar 2010-mi kingusinnerusukkulluunniit pisuni, aamma
- 2) inuussutissarsiutip nassatarisaanik nappaateqalerni, 1. januar 2010-mi kingusinnerusukkulluunniit nalunaarutigineqartuni.

Kalaallit Nunaanni Pinerluuteqarsimasunik Isumaginnittoqarfik, 7. december 2009

THOMAS NICOLAJSSEN